

आकाशवाणी जयपुर-अजमेर  
प्रादेशिक समाचार

दिनांक : 05.01.2026

समय : 18.45 बजे

- मध्यप्रदेश रा मुख्यमंत्री डॉ. मोहन यादव कहयो-एमपी अर राजस्थान रा तालमेल अर मदद ऊं विकास री नुवी इबारत लिखी जावेला ।
- रीजनल एआई इम्पैक्ट कॉन्फ्रेंस काल जयपुर मांय राख्यी जावेला ।
- प्रदेश मांय सीळो बायरो बाजण अर धुंअर व्हेवण ऊं जिन्दगी माथे असर पड़यो-कुछ जिलां मांय स्कूलां अर आंगनबाड़ी केन्द्रां रा बच्चां सारू छुट्टी रो ऐलाण ।
- सिख पंथ रा दसवां गुरु गोबिंद सिंह जी रा प्रकाश उत्सव रे मौके गुरुद्वारां मांय शबद कीर्तन अर लंगर रा कार्यक्रम ।

000

मध्य प्रदेश के मुख्यमंत्री डॉ. मोहन यादव कहयो है के एम.पी. अर राजस्थान बीचे पाणी ऊं जुड़यो कोई झगडो नी है। वे साफ कीनो के राजस्थान ने पाणी री जरूरत पड़बा री सूरत मांय मध्यप्रदेश पूरी मदद करेला। वे जयपुर मांय चाल रह्या राजस्थान डिजिफेस्ट-टाई ग्लोबल समिट-2026 मांय बोल रह्या हा। डॉ. यादव 'डेस्टिनेशन मध्य प्रदेश' सत्र मांय राजस्थान री बरकत री सराहवणा कीनी। वे कहयो के मध्यप्रदेश अर राजस्थान री भेळी विरासत सागे विकास ने तेज करण सारू दोन्यू राज्यां ने मिल र काम करणो व्हेला। मध्यप्रदेश रा मुख्यमंत्री कहयो के राजस्थान मांय पाणी री कमी नी आवण दी जावेला अर आवता बगत मांय विकास री नई इबारत लिखी जावेला।

000

सम्मेलन रा एक और खास सत्र 'लीडरशिप बियॉण्ड लेबल्स' मांय पैली वाळी केंद्रीय मंत्री स्मृति ईरानी महिलावां री अगुवाई अर सामाजिक जिन्दगी मांय वां री भागीदारी रा बारा मांय चर्चा कीनी। वे नौ करोड़ स्वयं सहायता समूहां ऊं जुड़ी महिलावां ने नुवा भारत री ताकत बताता थकां कहयो के महिलावां तकनीक, नीति अर स्टार्टअप सरीखा हर हलका मांय आगे बध रही है। एक और सत्र मांय दुबई इंटरनेट सिटी रा मैनेजिंग डायरेक्टर अम्मर अल मलिक आवता बगत मांय शहर बणावण अर वां रे वैश्विक हब बणबा री संभावनावां रा बारा मांय चर्चा कीनी। ई सागे ई जाणकार लोग न्हाना उद्योगां - एमएसएमई री तरक्की मांय राज्यां रा काम अर सहायक नीतियां रा महत्त्व रा बारा मांय ई बात कीनी।

000

शासन सुधार, माली विकास, नवाचार अर समावेशी प्रगति रा हलका मांय आर्टिफिशियल इन्टेलीजेंस-एआई रा काम रा बारा मांय चर्चा सारू काल जयपुर मांय रीजनल एआई इम्पैक्ट कॉन्फ्रेंस राख्यी जावेला। ई दौरान प्रदेश रा एआई इको सिस्टम ने मजबूत बणावण अर नवाचारां ने बधावो देवण सारू केई करार माथे सही करी जावण रा आसार है। इलेक्ट्रॉनिक्स अर सूचना प्रौद्योगिकी मंत्री अश्विनी वैष्णव, उद्योग राज्यमंत्री जितिन प्रसाद, मुख्यमंत्री भजनलाल शर्मा अर राज्य रा सूचना अर संचार मंत्री कर्नल राज्यवर्द्धन सिंह राठौड रो ई ई कॉन्फ्रेंस मांय शिरकत करण रो कार्यक्रम है।

000

प्रदेश मांय गैर कानूनी खुदाई रे खिलाफ चलाया जा रह्या अभियान रा तैत लारला एक हफता मांय 76 एफआईआर दर्ज करी ज्यी अर 17 जणा ने गिरफ्तार करी ज्या। ई दौरान खान विभाग 500 ऊं बत्ती मोटरगाडियां अर साज-ओ-सामान जब्त कर र 2 करोड़ 88 लाख रुप्या रो जुर्मानो वसूल कीनो। आज जयपुर कने चाकसू, दौलतपुरा अर सामोद हलकां मांय गैर-कानूनी तरीका ऊं निकाळी ज्या खनिज ले जाता थकां आठ गाडियां ने जब्त करी ज्यी।

000

भ्रष्टाचार निरोधक ब्यूरो चूरो मांय जोधपुर डिस्कॉम रा एक तकनीशियन ने एक लाख पैतालीस हजार रुप्या री घूस लेता थकां रंग्या हाथां पकड़ लीनो। ब्यूरो रा महानिदेशक गोविंद गुप्ता आ जाणकारी दीनी। वे बतायो

के आरोपित विनोद कुमार बीकानेर जिला मांय श्रीडूंगरगढ़ रा उपनी मुख्यालय मांय लाग्योडो है। वां माथे शिकायत करण वाळा ऊं खेती सारु बिजली रो कनेक्शन दूजा नाम ऊं लेवण अर वीसीआर री रकम कम करण रे बदले घूस लेवण रो आरोप है।

000

केन्द्रीय कृषि मंत्री शिवराज सिंह चौहान कह्यो है के मनरेगा मांय साफगोई लावण सारु विकसित भारत जी राम जी कानून लायी ज्यो है। वे आज तमिलनाडु रा ईरोड मांय किसानां सामी बोल रह्या हा। कृषि मंत्री कह्यो के ई कानून रा तैत मजूरी देवण रा दिनां री तादाद एक सौ ऊं बधा र सवा सौ दिन कर दीरीजी है। कृषि मंत्री कह्यो के मजूरी मिलण पाछे तैय बगत मांय चुकारो नी व्हेवण री सूरत मांय कानूनी कार्रवाई करी जावेला। वे कह्यो के देश रा गांवाई हलकां मांय बुनियादी ढांचो मजबूत बणायो जावेला। प्रदेश मांय ई ई बारा मांय जाग जगावण सारु भांत-भांत रा कार्यक्रम राख्या जा रह्या है। पाली जिला मांय रोहट रा कृषि विज्ञान केन्द्र री ओर ऊं किसानां सारु खास कार्यक्रम राखी ज्यो।

000

प्रदेश मांय सीळो बायरो बाजण अर धुंअर रेहवण ऊं जिन्दगी माथे असर पड़ रह्यो है। कोटा मांय एक ही दिन मांय पारो पौने नौ डिग्री सेल्सियस उतर जावण रे कारण ठारी और तेज पड़बा लागी है अर धुंअर रे कारण दूर ताई निजर नी आ रह्यो है। म्हाणा सर्वाईमाधोपुर खबरनवीस बतायो के दिन मांय बादळा मंड जावण अर सीळो बायरो बाजण ऊं वठे ई ठण्ड रो असर बध गयो है।

000

पाली, सिरौही, चित्तौड़गढ़, अजमेर अर सीकर मांय घणो सीळो बायरो बाजण लाग्यो है। मौसम विभाग रे मुजब आवता एक हफता ताई राज्य मांय जोरदार ठारी पड़बा रा आसार है जदके जयपुर संभाग मांय आवता तीन-चार दिन कोल्ड वेव रा आसार है। महकमो आवता दो-तीन दिन मांय पारो और उतरण सागे राज्य रा उतराद हलकां मांय शीतलहर चालण सारु चेटायो है। इण ने ध्यान राखता थकां हनुमानगढ़ मांय पहली ऊं 8वीं कक्षा ताई रा विद्यार्थियां सारु 10 जनवरी ताई छुट्टियां कर दीरी ज्यी है, हालाकि 9 ऊं 12वीं रा विद्यार्थियां सारु कक्षावां चालती रेहवेला। श्रीगंगानगर जिला मांय ई जिला कलेक्टर 5 वीं ताई रा विद्यार्थियां सारु 12 जनवरी ताई छुट्टी रो ऐलाण कर दीनो है, जदके छठी ऊं 12वीं कक्षा ताई रा विद्यार्थियां सारु स्कूल संवारे साढे 10 ऊं दोपहरां पाछे तीन बज्यां ताई खुलेला। डूंगरपुर मांय ई पहली ऊं 5वीं कक्षा ताई रा विद्यार्थियां अर आंगनबाड़ी केन्द्रां सारु 8 जनवरी ताई छुट्टियां रो ऐलाण करी ज्यो है।

000

उपमुख्यमंत्री दिया कुमारी आज जयपुर रा फौजी अस्पताल मांय मेडिकल कैंप रो उद्घाटन कीनो। ई मौके वे कह्यो के 15 जनवरी ने सेना दिवस रे मौके व्हेवण वाळा जळसा री सरुआत ई स्वास्थ्य शिविर ऊं करी ज्यी है। दिया कुमारी कह्यो के राज्य मांय सेना दिवस परेड पहली दफा व्हे रही है, जिण ने देखण सारु जनता मांय घणो उमाव है।

000

शिविर मांय पैली वाळा फौजियां अर वां रा पिरवारां ने दिल अर हड्डियां ऊं जुड़ी बीमारियां रा बारा मांय जाणकारी दी जा रही है।

000

सिख पंथ रा दसवां गुरु गुरुगोबिंद सिंह जी रो प्रकाश उत्सव आज मणायो जा रह्यो है। ई मौके धर्म री हिफाजत सारु वां रा योगदान ने याद कर्यो जा रह्यो है। प्रकाश उत्सव रे मौके गुरुद्वारां मांय सोहवणी सजावट करी ज्यी है अर कीर्तन दरबार अर अटूट लंगर लगाया जा रह्या है। भरतपुर अर पाली समेत न्यारा-न्यारा जिलां मांय गुरुद्वारां ने सोहवणी रोशनी अर फूलां ऊं सजायी ज्यो है। गुरुद्वारां मांय रागी जत्था शबद कीर्तन रा खास कार्यक्रम राख रह्या है अर जातरु माथो टेक र देश अर प्रदेश री खुशहाली री कामना कर रह्या है।

000

भरतपुर जिला रा केवलादेव राष्ट्रीय उद्यान मांय आं दिनां मोकळा सैलाणी पूग रह्या है। परिन्दां री नगरी रा नाम ऊं पिछाण्या जावण वाळा केवलादेव राष्ट्रीय उद्यान मांय अक्टूबर ऊं फरवरी महीना ताई साइबेरिया अर रूस ऊं प्रवासी परिन्दा आवे है। और ब्यौरो म्हाणा भरतपुर खबरनवीस ऊं-

000

श्रीगंगानगर जिला रा सरहदी हलका रावला मांय बिना मंजूरी दाखिल व्हेवण रा आरोप मांय दो विदेशी लोगां ने पकड़ी ज्यो है, ज्यां मांय एक महिला अर एक पुरुष शामिल है। हिरासत मांय लिया ज्यो दोन्यू जणां ऊं पूछताछ करी जा रही है।

000

69वीं राष्ट्रीय विद्यालय स्तरीय हैंडबॉल होड़ आज चित्तौड़गढ़ मांय सरू व्ही। 10 जनवरी ताई चालण वाली ई होड़ मांय न्यारा-न्यारा राज्यां रा 1050 खिलाड़ी भाग ले रह्या है। इण रा उद्घाटन जळसा मांय विधायक चंद्रभान सिंह आक्या खिलाड़ियां ने खेल भावना ऊं अनुशासन सागे खेलण री शपथ दिरायी। ई मौके जिला कलेक्टर आलोक रंजन कह्यो के आ होड़ विविधता मांय एकता री मिसाल है।